



22 April 2009 (Rabu)

Pindaan Enakmen Anugerah Negeri dilulus

KOTA KINABALU 22 April - Dewan Undangan Negeri (DUN) Sabah hari ini meluluskan pindaan rang undang-undang di bawah Enakmen Anugerah Negeri 1963 bagi membolehkan lebih ramai individu menerima Gred Kedua Darjah Yang Amat Mulia Kinabalu yang membawa gelaran Datuk. Menurut Pembantu Menteri kepada Ketua Menteri, Datuk Radin Malleh, pindaan itu membabitkan penambahan seramai 150 orang penerima, menjadikan jumlah keseluruhan penerima seramai 1,200 orang berbanding 1,050 sebelum ini.

"Kemajuan pesat Sabah adalah hasil komitmen padu semua pihak dalam masyarakat terhadap kerajaan dan sebagai pengiktirafan kepada mereka bagi khidmat cemerlang maka wajarlah kerajaan negeri memberi pengiktirafan kepada mereka. "Jadi pindaan ini perlu ekoran pertambahan jumlah individu yang layak menerima anugerah itu setiap tahun," katanya ketika ditemui pemberita pada hari terakhir sidang Dewan Undangan Negeri Sabah di sini hari ini.

22 April 2009 (Rabu)

Sabah terima RM10j untuk jeti pendaratan ikan

TAWAU 22 April - Sabah diperuntukkan RM10 juta di bawah Pakej Ransangan Ekonomi bagi pembinaan jeti baru atau menaik taraf jeti sedia ada di negeri ini. Timbalan Pengarah Lembaga Kemajuan Ikan Malaysia (LKIM) Mohd. Jamil Abdullah berkata sebanyak RM500,000 daripada peruntukan berkenaan akan diagihkan kepada 10 kawasan di seluruh Sabah yang sudah dikenal pasti bagi tujuan projek berkenaan.

"Kira-kira setengah juta daripada peruntukan berkenaan akan digunakan untuk menaik taraf jeti pendaratan ikan LKIM di Tanjung Batu Keramat dekat sini," katanya kepada pemberita selepas merasmikan Mesyuarat Agung Persatuan Nelayan Kawasan Tawau di sini semalam. Menurut Mohd. Jamil kawasan-kawasan lain yang akan menerima peruntukan berkenaan termasuk Kunak, Lahad Datu, Semporna, Sandakan, Pitas, Kota Marudu, Kudat, Beluran dan Kota Kinabalu.

Mohd. Jamil juga berkata sejak Jun 2008 hingga April tahun ini pihaknya telah membayar sebanyak RM170,000 sebagai bayaran insentif pendaratan ikan kepada nelayan di Tawau. Katanya di bawah skim insentif berkenaan, nelayan dibayar 10 sen bagi setiap satu kilogram ikan yang ditangkap. - Bernama

22 April 2009 (Rabu)

Kontraktor SPPPJ rugi RM20 juta

Oleh SITI AIRUNNISA ALAUI kota@utusan.com.my



MOHD. Abdullah Mohd. Mohaidin (kiri) dan ahli jawatankuasa SPPPJ menunjukkan notis penamatkan kontrak daripada Alam Flora pada sidang akhbar di Ampang semalam. - UTUSAN/ROY AZIS ABD. AZIZ

AMPANG JAYA 22 April - Sebanyak 68 kontraktor sampah di kawasan pentadbiran Majlis Bandaraya Petaling Jaya (MBPJ) terpaksa menanggung kerugian sebanyak RM20 juta apabila kontrak mereka akan ditamatkan oleh Syarikat Alam Flora Sdn. Bhd (Alam Flora) pada 15 Mei ini. Presiden Persatuan Kontraktor Sisa Pepejal dan Pembersihan Kawasan Petaling Jaya (SPPPJ), Datuk Mohd. Abdullah Mohd. Mohaidin berkata, kontrak tersebut ditamatkan tanpa sebarang sebab yang munasabah oleh Alam Flora walaupun sebelum ini satu surat aku janji yang menjamin kontrak mereka akan diteruskan telah dibuat.

Katanya, kesemua kontraktor tersebut terpaksa menanggung kerugian merangkumi bayaran pampasan pekerja yang diberhentikan, bayaran beli dan sewa lori serta bayaran kepada pembekal barang yang ditempah. "Sebelum ini, kami telah menerima notis pertama dari Alam Flora pada 30 Januari lalu yang menyatakan bahawa mereka tidak akan menyambung kerja-kerja pembersihan selepas 28 Februari lalu kerana mereka mempunyai rancangan untuk memasukkan kontraktor baru tanpa memberi alasan yang kukuh mengapa kami diberhentikan.

"Saya tidak faham mengapa kontrak kami dibatalkan secara tiba-tiba dan tanpa alasan yang kukuh sedangkan tiada rungutan daripada orang awam tentang kegagalan kerja-kerja pembersihan yang dilakukan oleh pihak kami. "Saya tidak mahu mengandaikan pembatalan kontrak berkenaan mempunyai unsur-unsur politik dan saya merayu agar mereka tidak menjadikan kami sebagai pertaruhan," katanya kepada pemberita pada sidang akhbar tentang pembatalan kontrak Alam Flora di Kelab Darul Ehsan, Ampang di sini hari ini.

Tambahnya, ekoran daripada notis tidak sambung kontrak tersebut, kontraktor di kawasan Kajang telah mengadakan tunjuk perasaan bagi membantah notis berkenaan. Berikut itu, Alam Flora telah membatalkan keputusan undian pemberian kawasan perkhidmatan untuk kontraktor baru yang dilantik malah mengekalkan semua kontraktor lama di kawasan masing-masing.

Tambahnya, bagi meredakan keadaan, satu memorandum antara Persatuan Gabungan Kontraktor Selangor (Perkasa) dengan Alam Flora telah dicapai pada 5 Mac lalu bagi menyelesaikan kemelut pemberhentian kontraktor sedia ada itu. "Pada 5 Mac lalu, memorandum telah dibuat di antara Alam Flora dengan campur tangan Timbalan Perdana Menteri (TPM) pada waktu itu yang dibuat di pejabatnya. "Dalam pertemuan dua pihak itu, Alam Flora telah memberi jaminan bahawa semua kontraktor yang terlibat akan dikenakan 'status quo' masing-masing," jelasnya.

Bagaimanapun, apa yang mengecewakan, jaminan tersebut hanya janji kosong apabila pada 15 April lalu Alam Flora telah mengeluarkan notis kedua untuk menamatkan khidmat semua kontraktor SPPPJ tanpa mengambil kira tanggungjawab korporat terhadap komuniti setempat. Ujarnya, mereka tiada pilihan selain merayu agar Alam Flora mempertimbangkan semula keputusan untuk menamatkan kontrak tersebut. "Kami masih waras dan tidak mahu menjadikan pilihan terakhir kami untuk membuat piket atau tunjuk perasaan, oleh yang demikian, saya harap Yang Amat Berhormat (YAB) Perdana Menteri dapat campur tangan dalam hal berkenaan agar 'nyawa'(kontrak) kami dapat disambung semula. "Nasihat saya kepada kontraktor agar meneruskan kerja-kerja pembersihan sehingga tarikh yang ditetapkan dan jangan jadikan orang awam sebagai mangsa dengan memboikot tidak mahu menjalankan tugas," tegasnya.

22 April 2009 (Rabu)

Naik taraf Hospital Lipis RM96 juta

KUANTAN 22 April - Kerajaan sedang menaik taraf Hospital Lipis bagi memberi lebih keselesaan kepada penduduk yang mendapatkan rawatan di hospital tersebut. Pengurus Jawatankuasa Kerajaan Tempatan, Alam Sekitar dan Kesihatan negeri, Datuk Hoh Khai Mun berkata, kerja-kerja menaik taraf yang menelan belanja sebanyak RM96 juta itu, dimulakan sejak Februari tahun lalu. Menurut beliau, kerja-kerja menaik taraf hospital itu membabitkan kemudahan wad umum, wad bersalin, dewan bedah, unit rawatan rapi (ICU) dan unit rawatan kardiologi (CCU). "Turut dinaik taraf ialah Jabatan Kemalangan dan Kecemasan (A&E) serta 100 lot tempat letak kenderaan bertingkat," katanya.

Beliau menjawab soalan **Abdul Rahman Mohamad (BN-Padang Tengku)** pada Persidangan Dewan Undangan Negeri (DUN) Pahang di Wisma Sri Pahang di sini hari ini. Khai Mun memberitahu, kerajaan bersetuju melaksanakan kerja-kerja menaik taraf itu memandangkan hospital tersebut kini berusia 70 tahun dan mempunyai banyak kekurangan dari segi kemudahan. Pada masa ini, kata beliau, Hospital Lipis menawar perkhidmatan rawatan pesakit luar dan dalam, dewan bedah, perkhidmatan x-ray, makmal serta klinik pakar. "Bagi rawatan pesakit dalam, sebanyak 128 katil disediakan dan kadar pengisian katil tahunan adalah sekitar 45 hingga 50 peratus," jelasnya.

Menjawab soalan **Ibrahim Awang Ismail (BN-Peramu Jaya)**, Khai Mun berkata, Jabatan Pengairan dan Saliran (JPS) membelanjakan sebanyak RM258 juta untuk mereka bentuk dan membaik pulih kuala Sungai Pahang. Menurutnya, projek yang bermula sejak 1 November tahun lalu itu dijangka siap sepenuhnya pada 31 Oktober 2011. "Antara skop dan komponen projek ini adalah membaik pulih dan memperbaiki muara Sungai Pahang di Tanjung Agas," katanya.

23 April 2009 (Khamis)

Kem 'usang' dibina semula

Oleh ROKIAH ABDULLAH rokiah.abdullah@utusan.com.my

PULAU PINANG 23 April - Sebanyak 11 kem tentera infantri di seluruh negara yang dianggap 'usang' akan dibina semula menggunakan teknik Sistem Binaan Industri (IBS) tidak lama lagi. Panglima Tentera Darat, Jeneral Tan Sri Muhammad Ismail Jamaluddin berkata, untuk permulaan, empat kem terlibat iaitu Batalion 12 Rejimen Askar Melayu Diraja (RAMD) di Kuantan, Batalion 25 RAMD Bentong, Batalion 15 RAMD Senawang dan Batalion 20 RAMD Miri.

Beliau berkata, pembiayaan keempat-empat projek tersebut termasuk dalam peruntukan yang diberikan oleh kerajaan untuk angkatan tentera dalam Rancangan Malaysia Kesembilan (RMK-9). Katanya, kebanyakan kem yang digunakan pada masa ini adalah bangunan tinggalan tentera British yang berusia antara 40 tahun hingga 60 tahun. "Bangunan ini sudah lama dan 'usang' dan ia tidak ekonomik langsung jika terus menyelenggara bangunan-bangunan tersebut kerana kosnya semakin meningkat. "Kita telah melancarkan *Army Care* untuk mengenal pasti kem-kem yang daif untuk dibina semula yang mana ia dilakukan secara berperingkat mengikut peruntukan kerajaan yang dijangka mengambil masa empat hingga lima tahun," katanya.

Beliau berkata demikian pada sidang akhbar selepas mengadakan lawatan ke Markas Divisyen Kedua Infantri Malaysia di Kem Tun Razak, Bukit Gedong di sini hari ini. Muhammad Ismail turut mengadakan perjumpaan dengan pegawai-pegawai kanan Markas Dua Divisyen. Jelas beliau, melalui kaedah IBS, kos dan jangka masa kem yang dibina semula dapat dikurangkan. Menurutnya, jika mengikut amalan biasa, sesebuah kem tentera mengambil masa antara 30 hingga 36 bulan untuk disiapkan.

"Tetapi melalui IBS, ia dapat disiapkan dalam masa enam hingga lapan bulan sahaja dan kosnya pula sekitar RM50 juta hingga RM60 juta iaitu separuh daripada kos asal iaitu RM90 juta sehingga RM110 juta. "Saya percaya dengan pembangunan semula kem-kem terlibat, ia dapat meningkatkan moral dan semangat anggota tentera yang selama ini terbelenggu dengan suasana tempat kerja yang 'usang' dan daif," katanya.

23 April 2009 (Khamis)

30 lokasi berisiko tanah runtuh di kesan

PULAU PINANG 23 April - Sebanyak 30 lokasi berisiko tanah runtuh dikesan di sepanjang lima kilometer laluan kenderaan dari Jalan Kebun Bunga menghala ke Bukit Bendera di sini. Bagaimanapun, Jurutera Jalan Raya Jabatan Kerja Raya (JKR) negeri B.S. Tan berkata, lokasi yang dikenalpasti itu masih dikategorikan sebagai tidak merbahaya dan dipantau pihaknya dan kontraktor yang bertanggungjawab di kawasan berkenaan. "Kami cuba lakukan yang terbaik untuk kerja-kerja penyelenggaraan di sekitar kawasan yang dikenal pasti boleh berlaku tanah runtuh itu. "Ia bagi mengelak sebarang kejadian tidak diingini berlaku," katanya pada sidang akhbar selepas melawat kejadian tanah runtuh di kilometer 4.6 menghala Bukit Bendera semalam.

Dalam kejadian pukul 4.30 petang semalam di Jalan Jeep Track itu, tembok batu bersangkar bernilai RM200,000 yang siap dibina pada Januari lepas runtuh akibat hakisan tanah berikutan hujan lebat. Menurut Tan, jalan itu merupakan jalan simpanan yang biasanya hanya digunakan oleh jip-jip JKR. "Hujan lebat beberapa jam semalam menyebabkan tanah di bawah cerun bukit menjadi lembap dan menyebabkan tanah runtuh. "Begitu juga dengan tanah di bahagian bawah tempat kejadian yang didapati tidak stabil turut mendorong kepada hakisan tersebut," katanya.

Menurut Tan, September tahun lalu kejadian yang sama pernah berlaku beberapa meter dari tempat kejadian tersebut. "Buat masa sekarang, kami akan menutup kawasan tanah runtuh ini bagi mengelakkan hakisan yang lebih teruk berlaku. "Ia juga bagi memperkuatkan semula struktur tanah ini menggunakan teknik tertentu sebelum sebarang tindakan lanjut diambil," kata Tan.

Katanya, kes itu kini dalam pemantauan pihak JKR dan kontraktor yang bertanggungjawab ke atas projek tersebut. Dalam pada itu, Ahli Parlimen Bukit Bendera, Liew Chin Tong yang turut melawat lokasi tersebut melahirkan kebimbangannya terhadap kejadian itu selain berjanji satu laporan siasatan akan dihantar kepada Ketua Menteri, Lim Guan Eng.

24 April 2009 (Jumaat)

Buang mentaliti lapuk dalam sektor perkhidmatan

KUALA LUMPUR 24 April - Industri perkhidmatan tempatan perlu membuang mentaliti lapuk yang takut berdepan dengan persaingan dan terlalu mengharapkan perlindungan kerajaan. Presiden MCA, Datuk Seri Ong Tee Keat berkata, pemain industri itu tidak boleh lari daripada persaingan dalam era globalisasi dan pasaran terbuka. Mereka juga katanya, harus yakin dengan kemampuan diri sendiri untuk bersaing di peringkat global terutama selepas kerajaan

melaksanakan dasar liberalisasi dalam sektor perkhidmatan. "Inilah peluang untuk sektor perkhidmatan tempatan membuktikan kemampuan menawarkan perkhidmatan yang berkualiti dan bukan selamanya bergantung di bawah ekuiti. "Buang semua mentaliti lapuk kerana kerajaan sebenarnya yakin industri perkhidmatan tempatan kini telah sedia untuk menembusi pasaran antarabangsa," katanya kepada pemberita selepas merasmikan Pameran Pendidikan Vokasional, Latihan dan Amali (Train) di sini hari ini.

Beliau diminta mengulas langkah kerajaan meliberalisasikan 27 subsektor perkhidmatan berkuat kuasa serta-merta tanpa sebarang syarat ekuiti dikenakan. Perdana Menteri, Datuk Seri Najib Tun Razak ketika mengumumkan dasar itu berkata, subsektor yang diliberalisasikan adalah dalam bidang perkhidmatan kesihatan dan sosial, pelancongan, pengangkutan, perniagaan, komputer dan yang berkaitan. Menurut Najib, dasar baru itu bertujuan membentuk satu persekitaran perniagaan yang kondusif bagi menarik pelaburan, teknologi serta menjana peluang pekerjaan bertaraf tinggi.

Perdana Menteri juga memberi jaminan bahawa dasar berkenaan tidak akan menjelaskan kaum bumiputera kerana yakin golongan berkenaan mampu mengambil bahagian dalam persaingan terbuka. Mengulas lanjut, Tee Keat berkata, dasar liberalisasi itu juga menunjukkan kerajaan bersikap terbuka dan memberi layanan sama rata kepada semua kaum. "Daripada mempertikaikan kononnya kerajaan tidak prihatin terhadap kepentingan pihak tertentu, rebutlah peluang yang terbuka ini untuk bersaing," tegasnya.

Terdahulu, beliau memberitahu, lebih 1,000 pelajar lepasan Sijil Pelajaran Malaysia (SPM) yang gagal mendapat keputusan cemerlang memohon untuk menjalani latihan vokasional dan amali di pusat latihan kemahiran, Edu Mall@South City di Seri Kembangan dekat sini. Katanya, sambutan terhadap program itu yang baru sahaja diperkenalkan dua bulan lalu sangat memberangsangkan. "Kita menyasarkan 5,000 pelajar mengikuti program latihan yang disediakan. Ia peluang kedua bagi mereka yang kurang cemerlang akademik untuk mendapat tempat dalam bidang pekerjaan yang diminati kelak. "Lebih penting sesi vokasional dan amali yang ditawarkan itu berjaya menarik minat pelajar daripada pelbagai kaum dan ini jelas membuktikan kejayaan sistem pendidikan," katanya.

Antara program yang ditawarkan di pusat itu adalah kejuruteraan automotif, seni kulinari, kosmetik, kejururawatan dan hospitaliti.

24 April 2009 (Jumaat)

RM362 juta biaya penambahbaikan logistik PDRM

JOHOR BAHRU 24 April - Polis Diraja Malaysia (PDRM) akan melakukan penambahbaikan logistik yang melibatkan peruntukan sejumlah RM362 juta untuk memperkuatkan lagi organisasi berkenaan pada masa akan datang. Ketua Polis Negara, Tan Sri Musa Hassan berkata, ia

melibatkan peruntukan pakej rangsangan ekonomi yang diumumkan baru-baru ini berjumlah RM250 juta bagi fasa pertama dan RM112 juta bagi fasa kedua.

Beliau berkata, keutamaan akan diberikan kepada kerja-kerja menaik taraf balai dan berek polis di seluruh negara selain beberapa perolehan peralatan pengoperasian. "Peralatan (aset) ini penting dan jika tidak dibeli akan membantutkan operasi PDRM. Contohnya, pembelian bot-bot bagi memastikan keselamatan sempadan negara dapat diperketatkan. "Selain itu, peralatan sistem komunikasi juga akan diberi perhatian dengan meningkatkan sistem secara bersepadu dan digital. "Ia perlu agar penyampaian maklumat kepada pegawai dapat dilaksanakan dengan cepat dan tepat bagi membanteras jenayah," katanya.

Beliau bercakap kepada pemberita selepas Mesyuarat Pengarah-Pengarah Logistik PDRM, di sini hari ini. Musa berkata, penambahbaikan lain turut diberi perhatian dengan melibatkan kerja-kerja menaik taraf keperluan dan kelengkapan forensik siber dan sistem ujian asid deoksiribonukleik (DNA). Jelasnya, PDRM memerlukan kelengkapan itu bagi membantu menyelesaikan siasatan dengan cepat terutama membabitkan pemindahan data ketika melakukan analisis bahan bukti. Terdahulu dalam mesyuarat itu, beliau mengingatkan pegawai polis agar bekerja dengan amanah, jujur serta memastikan tidak berlaku pembaziran ketika mencadangkan sebarang perolehan yang hendak dibuat kerana ia melibatkan duit rakyat.

Menurutnya, setiap pelaksanaan perlu disemak dan dipantau oleh pegawai logistik dan ketua polis bagi menentukan spesifikasi kerja dapat dilaksanakan dengan betul. "Saya minta mereka berbincang dan membuat kajian dengan mendalam terhadap apa-apa alasan yang diperlukan," katanya.

24 April 2009 (Jumaat)

Kontraktor Melayu gulung tikar

KUALA LUMPUR 24 April - Lebih 700 kontraktor air Melayu bakal hilang punca pendapatan dan 30,000 pekerja diberhentikan sekiranya kerajaan gagal menangani isu pembekuan Projek Fasa ketiga Syarikat Bekalan Air Selangor (Syabas) bernilai RM2.6 bilion. Setiausaha Agung Dewan Perniagaan Melayu Malaysia (DPMM), Mohd. Fadzli Mustafa berkata, DPMM menyarankan projek berkenaan ditarik balik dengan kadar segera. "DPMM memandang serius perkara ini kerana ia bukan sahaja mengundang gejala sosial jika peluang mencari nafkah yang halal tiada lagi, malah pertumbuhan ekonomi negara turut terjejas kerana usahawan kecil, sederhana dan besar adalah sebahagian daripada pencetus pertumbuhan ekonomi," kata beliau dalam kenyataannya di sini hari ini.

Mohd Fadzli berkata demikian sebagai mengulas penangguhan projek berkenaan yang terpaksa dilakukan oleh Syabas atas arahan kerajaan bagi memberi laluan kepada penyusunan semula pengurusan air. Sejumlah 7.4 juta pengguna di Selangor, Kuala Lumpur dan Putrajaya berdepan

risiko gangguan bekalan air berikutan penangguhan projek baik pulih dan naik taraf bekalan di tiga kawasan padat penduduk itu. Katanya, DPMM turut menggesa supaya kerajaan Pusat mengaktifkan semula projek di bawah kendalian Syabas itu dengan satu bentuk pakej rangsangan. Katanya, kesinambungan kerja-kerja perlu diteruskan bagi memastikan usahawan Bumiputera terus bernyawa di saat-saat krisis ekonomi yang tidak menentu ketika ini. "Oleh sebab itu, Perdana Menteri perlu memberi perhatian secara serius bagi memastikan kesinambungan kerja-kerja yang melibatkan kepentingan kontraktor Melayu," katanya.

24 April 2009 (Jumaat)

15 kontraktor tempatan dapat tender projek SDC



MUSA Aman (tengah) menyaksikan Ir.Yahya Awang Kahar (kiri) menyerahkan surat setuju terima projek SDC kepada salah seorang kontraktor pada majlis perjumpaan dengan kontraktor di Kementerian Kewangan Negeri Sabah di Kota Kinabalu, semalam.

KOTA KINABALU 24 April - Koridor Pembangunan Sabah (SDC) yang dilancarkan tahun lalu maju setapak lagi apabila kerajaan negeri hari ini menganugerahkan sebanyak 15 tender projek pembinaan kepada 15 kontraktor tempatan untuk dilaksanakan serta-merta. Ketua Menteri, Datuk Seri Musa Aman berkata, ia merupakan fasa pertama penganugerahan projek di bawah SDC yang dipilih secara tender terbuka. "Nilai keseluruhan projek berkenaan adalah RM34.7 juta dan selepas ini akan ada lagi pengumuman membabitkan fasa seterusnya," katanya.

Beliau berkata demikian pada sidang akhbar selepas menyaksikan majlis penyerahan surat tawaran kepada 15 kontraktor berkenaan oleh Pengarah Jabatan Kerja Raya Sabah, Ir. Yahya Awang Kahar di Wisma Kewangan di sini hari ini. Hadir sama Setiausaha Kerajaan Negeri, Datuk Sukarti Wakiman dan Ketua Pegawai Eksekutif, Pihak Berkuasa Pembangunan Ekonomi dan Pelaburan Sabah (Sedia), Datuk Dr. Mohd. Yaakub Johari.

Musa berkata, semua kontraktor yang dipilih perlu melaksanakan amanah yang telah diberikan dengan baik, sekali gus membuktikan kontraktor tempatan berupaya melaksanakan projek pembangunan. "Apa yang penting pastikan projek siap mengikut jadual, spesifikasi dan kualiti yang ditetapkan. Kerajaan negeri sedia memberi pertolongan asalkan ia dapat memberi manfaat dan kebaikan kepada semua pihak khususnya rakyat," katanya.

Beliau turut berharap supaya sepanjang pelaksanaan projek berkenaan tidak timbul isu-isu seperti tender telah 'dialibabakan' atau 'disub-subkan.' "Anda mungkin boleh berbangga kerana mendapat projek tetapi bangga sahaja tidak cukup kalau kerja tidak disiapkan dengan sempurna," katanya.

Musa menambah, kontraktor yang menunjukkan rekod yang baik akan dipertimbangkan untuk diberikan projek kerajaan pada masa akan datang. 'Perlu diingat projek di bawah SDC bernilai RM2.37 bilion. Jadi masih ada banyak lagi peluang pada masa akan datang," katanya.

24 April 2009 (Jumaat)

Terkejut lawat bangunan JPJ usang



ABDUL Rahim Bakri (kanan) melihat lantai yang retak teruk di bangunan utama Kompleks Jabatan Pengangkutan Jalan di Jalan Bundusan, Kota Kinabalu, semalam.

KOTA KINABALU 24 April – Timbalan Menteri Pengangkutan, Datuk Abdul Rahim Bakri yang dalam kunjungan melawat jabatan dan agensi di bawah kementerian itu di negeri ini, terkejut melihat keadaan usang bangunan Jabatan Pengangkutan Jalan (JPJ) di Jalan Bundusan di sini. Selain usang, bangunan itu juga mengalami keretakan serius dan kelihatan tidak lagi selamat untuk digunakan. Apa yang membimbangkan beliau ialah tahap keselamatan bangunan itu sentiasa dikunjungi orang ramai yang berurusan dengan JPJ termasuk memperbaharui lesen dan cukai jalan masing-masing

"Saya akan membawa perkara ini untuk perhatian dan tindakan kementerian supaya satu penyelesaian dapat diambil. "Saya terkejut dengan keadaan bangunan di sini yang tidak selamat. Keretakan ada di mana-mana dan sebahagian bangunan ini tidak lagi sesuai digunakan," katanya kepada pemberita selepas meninjau Kompleks JPJ di sini hari ini. Rahim menambah, keretakan pada bangunan utama amat jelas dan membimbangkan terutama di bahagian lantai dan dinding di tingkat atas bangunan berkenaan.

24 April 2009 (Jumaat)

3% 'projek sakit' di Pahang

Oleh YULPISMAN ASLI utusanpahang@utusan.com.my

KUANTAN 24 April - Hanya kira-kira tiga peratus projek di bawah Rancangan Malaysia Kesembilan (RMK-9) di Pahang dikategorikan sebagai 'projek sakit.' Pengarah Jabatan Kerja Raya (JKR) Pahang, Datuk Ir. Rosman Yahya berkata, kebanyakan projek terbabit yang gagal disiapkan melebihi tempoh tiga bulan membabitkan projek membina bangunan sekolah. "Antara sebab projek tersebut lewat disiapkan ialah kontraktor berdepan dengan masalah pengurusan dan kewangan yang tidak betul," katanya kepada pemberita semalam.

Beliau ditemui selepas majlis penyerahan surat setuju terima projek-projek di bawah pakej rangsangan ekonomi yang disempurnakan oleh Menteri Besar Pahang, Datuk Seri Adnan Yaakob di sebuah hotel di Teluk Chempedak di sini. Dalam majlis itu, sebanyak 55 kontrak berjumlah RM275 juta, termasuk 41 di bawah dua pakej rancangan ekonomi yang diumumkan kerajaan sebelum ini, diserahkan kepada kontraktor terbabit. Sementara 14 lagi projek yang diberikan merupakan projek di bawah RMK-9. Sementara itu, Rosman berkata, pihaknya telah melantik kontraktor baru bagi menyiapkan projek naik taraf Jalan Tanjung Lumpur di sini, sejauh sembilan kilometer yang sepatutnya siap pada tahun 2007.

+Beliau berkata, projek itu yang dimulakan pada 2005, gagal disiapkan mengikut jadual setelah kontraktor sebelum ini berdepan dengan masalah pengurusan dan bebanan kewangan. "Syarikat kontraktor terbabit berdepan dengan masalah pengurusan dan tidak dapat menampung kos yang meningkat secara mendadak. "Kita telah berusaha untuk membantunya tetapi syarikat berkenaan masih gagal menyelesaikan masalah yang dihadapi dan terpaksa ditamatkan kontraknya," katanya.

Mengikut jadual asal, projek naik taraf jalan sepanjang 12.6 kilometer itu bermula pada 12 Disember 2005 dan dijadual siap pada 11 Jun 2007. Projek itu menelan belanja asal RM18.8 juta, namun setelah dipanjangkan tempoh pelaksanaan, kosnya bertambah kepada RM25 juta. Sementara itu, Adnan dalam ucapannya menasihatkan kontraktor yang diberi projek oleh kerajaan tidak 'joli' sebaliknya menyiapkan projek tersebut dalam tempoh ditetapkan. "Jangan ada kontraktor joli dan sebagainya sebab apabila wang dihabiskan, projek sangkut (gagal disiapkan), maka kita akan berdepan masalah disenarai hitam," katanya.

Beliau turut mengingatkan kontraktor supaya lebih bertanggungjawab dan tidak menyiapkan projek mereka sambil lewa bagi mengelak sebarang kemungkinan.

24 April 2009 (Jumaat)

FAMA sedia pasarkan produk usahawan tani



IBRAHIM Mat Amin (kiri) dan Ibrahim Yaakob bertukar-tukar dokumen selepas majlis menandatangani MoU Ladang Kontrak yang turut disaksikan oleh Menon Jali (empat dari kiri) semalam.

TEMERLOH 24 April – FAMA Pahang akan membantu usahawan tani yang menghadapi masalah pemasaran dengan membeli hasil keluaran mereka pada harga lebih tinggi berbanding harga ditawarkan orang tengah. Pengarahnnya, Menon Jali berkata, pihaknya akan terus membantu para petani dengan syarat mereka mengeluarkan hasil seperti sayur-sayuran dan buah-buah bermutu dan memenuhi gred ditetapkan. Katanya, setakat ini FAMA tiada masalah memasarkan produk tersebut di beberapa bandar besar seperti Kuala Lumpur dan Johor Bahru malah mengeksport ke Singapura. “Para petani tidak perlu bimbang soal pemasaran, FAMA sedia bantu beli dengan harga tinggi asalkan mereka mampu mengeluarkan buah yang bermutu tinggi bagi memenuhi tuntutan pemasaran,” katanya.

Beliau berkata demikian pada majlis menandatangani memorandum persefahaman (MoU) program Ladang Kontrak antara FAMA dan 36 petani di Jergoh, Lanchang di sini hari ini. Turut hadir di majlis tersebut ialah Pengurus Pusat Operasi FAMA Temerloh, Ibrahim Mat Amin dan wakil petani Jergoh, Lanchang, Ibrahim Yaakob. Menerusi MoU itu, FAMA akan membeli hasil buah cempedak daripada kawasan ladang seluas 50 hectar.

Menurut Menon, bagi menghasilkan buah yang bermutu, para petani perlu menggunakan benih-benih yang berkualiti agar hasil yang dikeluarkan mendapat pasaran yang baik. Katanya, menerusi program Ladang Kontrak, FAMA dapat membantu usahawan tani mengeluarkan hasil yang mampu memenuhi jaminan aspek keselamatan makanan. Beliau memberitahu, semua hasil ladang akan dikumpulkan di pusat pengumpulan dan pemasaran sebelum FAMA membuat penggredan serta pembungkusan bagi memenuhi kehendak pengguna dan pengilang.

Dalam perkembangan lain, beliau mengingatkan para petani supaya tidak mudah terpengaruh dengan pihak tertentu yang menawarkan pelbagai jenis benih seperti pokok serai dan sebagainya. Katanya, pihak terbabit berjanji membeli semula produk berkenaan apabila mencapai tahap matang tetapi apabila tiba masanya mereka tidak membeli balik dengan memberi pelbagai alasan kononnya produk itu tidak bermutu dan gagal memenuhi syarat yang dikehendaki.

26 April 2009 (Ahad)

Timbalan Menteri Wilayah Persekutuan 'tangkap' doktor HKL

KUALA LUMPUR 26 April — Timbalan Menteri Wilayah Persekutuan Datuk M. Saravanan hari ini "menangkap" dua doktor di jabatan kecemasan Hospital Kuala Lumpur (HKL) kerana membaca akhbar dan melakukan kerja peribadi, bukannya merawat lebih 20 pesakit yang menunggu dalam kesakitan untuk mendapat rawatan. Penemuan yang memerlukan Saravanan itu berlaku kira-kira 10.30 pagi ini apabila beliau pergi ke hospital berkenaan untuk melawat seorang pelajar universiti yang cedera selepas dilanggar kereta yang dipandu oleh pemandu beliau (Saravanan).

"Saya juga menunggu seketika untuk pelajar perempuan itu mendapat rawatan dan setelah menyedari tidak seorang pun pesakit dipanggil masuk oleh doktor, saya terus membuka pintu bilik rawatan. Saya terkejut apabila mendapati seorang doktor sedang membaca surat khabar dan seorang lagi buat hal sendiri dan melakukan kerja peribadi. "Ada lebih 20 pesakit yang menunggu di luar untuk mendapat rawatan. Ini bukanlah cara seseorang doktor bekerja. Pesakit sepatutnya diutamakan. Lagi pun, ini adalah unit kecemasan, yang sepatutnya pantas dalam memberikan rawatan," kata Saravanan, yang jelas kelihatan kesal, kepada Bernama. Saravanan berkata beliau menegur doktor terbabit kerana kelakuan mereka dan mendesak untuk berjumpa pegawai atasannya mereka, yang muncul 30 minit kemudian.

26 April 2009 (Ahad)

Banjir kilat masih berterusan

Oleh ROSLAH OTHMAN kota@utusan.com.my



T. MURUGIAH (kiri) menunjukkan sampah sarap termasuk plastik minuman dan tiub motosikal serta sisa bahan binaan yang dibuang sewenang-wenangnya di kawasan Lebuh Ampang. - UTUSAN/ ZULAZHAR SHEBLEE

KUALA LUMPUR 26 April - Langkah mengindah dan menaik taraf serta membaik pulih tempat tumpuan pelancong di ibu negara merupakan antara fokus utama Dewan Bandaraya Kuala Lumpur (DBKL). Lebuh Ampang yang terletak di tengah-tengah ibu kota dan merupakan antara kawasan yang paling sibuk tidak terkecuali daripada menerima sentuhan DBKL agar sentiasa kelihatan segar. Bagaimanapun, di sebalik pelbagai tarikan tersendiri itu, kawasan yang juga

dikenali sebagai *Little India* itu tidak terkecuali daripada beberapa masalah yang tidak pernah selesai terutama banjir kilat.

Setiap kali berlakunya fenomena alam itu, ia menimbulkan tanda tanya tentang apakah yang telah dilakukan oleh DBKL selama ini untuk menanganinya. Walaupun DBKL mengakui telah melakukan pelbagai usaha untuk mengatasi masalah itu namun segala usaha berkenaan dilihat tidak menyelesaikan masalah itu sepenuhnya sehingga kini. Terbaru, usaha membaiki dan menaik taraf jalan yang dilaksanakan di kawasan itu sejak lebih sebulan lalu telah memburukkan lagi masalah yang sedia ada di kawasan Lebuh Ampang.

Akibat kurangnya sikap prihatin oleh pihak yang dipertanggungjawabkan menjalankan projek itu, masalah yang lebih besar didakwa berlaku di situ. Sekalipun para peniaga menyambut baik usaha menaik taraf jalan itu tetapi mereka kesal kerana pihak kontraktor tidak menguruskan dengan baik soal batu dan pasir yang digunakan. Para peniaga mendakwa batu dan pasir daripada kerja-kerja menaik taraf jalan itu telah mengakibatkan lumpur terkumpul seterusnya menyumbang kepada berlakunya banjir kilat.

Keadaan itu bukan sahaja menyebabkan saliran air di longkang tersumbat, ia turut mengakibat kelancaran lalu lintas di kawasan berkenaan terganggu. Selain itu, pencemaran debu dari sebuah tapak pembinaan berhampiran yang sedang giat dijalankan turut didakwa memberi kesan kepada peniaga di kawasan itu. Difahamkan, pembinaan bangunan kedai 24 tingkat termasuk 4 tingkat ruang letak kereta itu menyebabkan debu-debu berterbangan sehingga turut menjadkan perniagaan beberapa peniaga.

Mereka mendakwa pernah tiga hari berturut-turut kawasan berkenaan 'bergelap' gara-gara diselubungi debu-debu hitam. Bagaimanapun, tinjauan *Utusan Malaysia* ke kawasan tapak pembinaan itu mendapati dinding keselamatan telah pun dipasang bagi menangani masalah pencemaran debu tersebut. Pengerusi Persatuan Peniaga-Peniaga Lebuh Ampang, Abdul Rasull Abdul Razak berkata, aduan telah dibuat kepada DBKL tetapi beliau mendakwa tiada sebarang tindakan diambil. Enggan terlalu lama dibelenggu masalah tersebut, aduan itu dipanjangkan pula kepada Biro Pengaduan Awam (BPA) Jabatan Perdana Menteri.

Kurang 24 jam aduan dibuat, Timbalan Menteri di Jabatan Perdana Menteri, Senator T. Murugiah turun padang bagi meninjau serta bertemu beberapa peniaga di kawasan berkenaan. Dalam sesi lawatan selama kira-kira dua jam bermula di Lorong 1 hingga 3 di kawasan berkenaan, beberapa masalah lain yang membelenggu para peniaga yang kebanyakannya sudah lebih 20 tahun menjalankan perniagaan di kawasan itu dikesan. Antaranya, masalah sampah yang tidak diuruskan dengan baik sehingga menyebabkan bau serta longkang tersumbat.

Murugiah dalam sidang media yang diadakan selepas sesi lawatan tersebut berjanji akan membawa perkara tersebut kepada Datuk Bandar Kuala Lumpur agar tindakan segera dapat diambil demi memastikan kawasan berkenaan bersih dan selesa untuk orang ramai dan peniaga. Katanya, masalah tersebut tidak akan terjadi sekiranya DBKL melakukan kerja-kerja

pemantauan dengan lebih kerap. "Walaupun kerja-kerja pembersihan telah diserahkan kepada Alam Flora, DBKL masih bertanggungjawab memantau kawasan di bawah seliaannya. "Saya mencadangkan agar pihak DBKL dapat menyediakan unit pemantauan bagi memastikan masalah yang dihadapi para peniaga di seluruh ibu negara dapat diselesaikan segera," ujarnya.

Beliau juga tidak menolak kemungkinan masalah sistem perparitan tidak sempurna serta sampah sarap yang dibuang ke longkang oleh individu tidak bertanggungjawab antara punca banjir kilat kerap berlaku di kawasan tersebut. Dalam pada itu, Murugiah menambah, langkah turun padang yang diambil bukan bermaksud untuk melangkaui bidang tugas pihak berkuasa tempatan tetapi bagi memastikan nasib rakyat dibela tanpa mengira keturunan, agama dan bangsa. Biarpun tempoh lawatan agak singkat tetapi ia dilihat memberi harapan kepada kira-kira 130 peniaga di kawasan itu bahawa masalah yang mereka hadapi akan diselesaikan tidak lama lagi.

26 April 2009 (Ahad)

Pengurusan PPK diarah kutip hutang RM20j

PASIR PUTEH 26 April — Pengurusan 206 Pertubuhan Peladang Kawasan (PPK) di seluruh negara diarah mengutip hutang kira-kira RM20 juta termasuk hutang lapuk daripada anggota masing-masing supaya lebih ramai lagi anggota pertubuhan itu mendapat faedah pinjaman. Ketua Pengarah Lembaga Pertubuhan Peladang (LPP) Mariam Mas Yaakob berkata keengganan peminjam membayar hutang menyukarkan sesebuah PPK mengagih-agihkan pinjaman yang diperuntukkan di bawah Program Usahawan Peladang itu kepada anggota lain yang turut memerlukannya. "Terdapat sesetengah mereka sengaja tidak mahu membayar wang pinjaman balik dengan menganggapkannya ia sebagai wang percuma dan hadiah daripada kerajaan," katanya kepada pemberita selepas merasmikan mesyuarat agung tahunan PPK Semerak di sini, hari ini.

Mariam Mas berkata apa yang lebih dikesali ada juga di kalangan mereka sejak awal permohonan lagi sudah berniat tidak akan membayarnya. Beliau berkata bagaimana terdapat sebilangan mereka tidak dapat membayarnya disebabkan projek yang diusahakannya mengalami kerugian seperti banjir, penyakit dan tidak mendapat hasil sebagaimana yang dirancangkan. Katanya pihak pengurusan PPK seharunya mengambil cara pendekatan bijak dengan memperbanyakkan program kesedaran dalam usaha mendapatkan balik wang pinjaman itu seperti menyedarkan mereka tentang dosa pahala orang yang tidak mahu membayar hutang. Beliau berkata kerajaan pusat meluluskan peruntukan besar bagi program pinjaman itu di bawah Rancangan Malaysia Kesembilan (RMK-9) bermula tahun 2006 sehingga 2010 melibatkan RM20 hingga RM30 juta.

27 April 2009 (Isnin)

Liberalisasi kewangan

Oleh ZULKIFLI JALIL dan HELMI MOHD. FOAD pengarang@utusan.com.my

PUTRAJAYA 27 April - Kerajaan hari ini mengumumkan enam teras pakej liberalisasi bagi sektor kewangan yang akan dilaksanakan sehingga 2012 termasuk pemberian sembilan lesen baru kepada peserta industri sektor berkenaan. Perdana Menteri, Datuk Seri Najib Tun Razak berkata, langkah-langkah liberalisasi itu bertujuan menggalakkan perubahan struktur dalam kewangan serta mempelbagaikan sumber pertumbuhan untuk terus memacu ekonomi negara.

"Dalam tempoh tiga tahun lalu, sektor kewangan dan insurans telah berkembang sebanyak 8.8 peratus setahun mengatasi pertumbuhan Keluaran Dalam Negeri Kasar (KDNK) benar sebanyak 6 peratus. Terdapat lebih 140,000 pekerja dalam sektor perbankan dan insurans. "Melangkah ke hadapan, sektor kewangan dijangka menjadi pendorong dan pemangkin pertumbuhan ekonomi yang lebih penting dalam peralihan Malaysia ke arah mencapai status ekonomi maju pada 2020," katanya.

Najib mengumumkan demikian pada sidang akhbar di pejabatnya di sini, empat hari selepas memutuskan liberalisasi dalam sektor perkhidmatan Rabu lalu. Enam teras pakej liberalisasi bagi sektor kewangan meliputi:

Pengeluaran lesen baru kepada peserta industri kewangan yang kukuh dan bertaraf dunia dalam kategori seperti berikut:

- i) Dalam 2009, sehingga dua lesen perbankan Islam baru kepada peserta asing untuk menubuhkan bank-bank Islam baru dengan modal berbayar sekurang-kurangnya AS\$1 bilion.
- ii) Dalam 2009, dua lesen perbankan perdagangan baru akan ditawarkan kepada peserta asing yang akan membawa kepakaran khusus.
- iii) Dalam 2011, sehingga tiga lesen perbankan perdagangan baru akan ditawarkan kepada bank-bank bertaraf dunia yang dapat memberikan manfaat besar kepada Malaysia.
- iv) Dalam 2009, dua lesen takaful keluarga baru akan diberikan.

Kelonggaran akan diberikan bagi meningkatkan had ekuiti asing bank pelaburan, bank Islam, syarikat insurans dan pengendali takaful daripada 49 peratus kepada 70 peratus. Hubungan ini akan memperkuatkan potensi perniagaan dan meningkatkan prospek pertumbuhan institusi kewangan melalui kepakaran antarabangsa dan rangkaian hubungan global pemilik asing. Had pegangan ekuiti asing bagi bank perdagangan domestik tetap kekal pada tahap 30 peratus.

Memberi lebih fleksibiliti kepada institusi kewangan asing yang beroperasi di Malaysia untuk memperluas jangkauan produk dan perkhidmatan kewangan terutamanya melalui pembukaan cawangan baru. Ini bagi mencapai akses yang lebih meluas dalam memberikan perkhidmatan kewangan dan meningkatkan penembusan insurans di dalam negeri. Bank-bank perdagangan asing yang diperbadankan di Malaysia akan dibenarkan membuka empat cawangan baru dalam 2010 dan 10 cawangan pembiayaan mikro tahun ini.

Lebih fleksibiliti akan diberikan kepada peserta luar pesisir Labuan. Berkuat kuasa 1 Jun ini, Syarikat Induk Labuan yang diperbadankan di bawah Akta Syarikat Luar Pesisir 1990 akan diberikan fleksibiliti untuk menubuhkan pejabat operasi dan pengurusan di Kuala Lumpur bagi meningkatkan kecekapan operasi dan perniagaan mereka. Inisiatif ini akan membolehkan Syarikat Induk Labuan menjalankan perniagaan mereka dengan lebih berkesan dan cekap.

Bagi menyediakan persekitaran perniagaan yang lebih fleksibel dari segi pengendalian, institusi perbankan luar pesisir yang dilesenkan oleh Lembaga Perkhidmatan Kewangan Luar Pesisir Labuan (LOFSA) yang memenuhi kriteria yang telah ditetapkan akan diberikan fleksibiliti untuk beroperasi di dalam negeri mulai 2010. Syarikat insurans luar pesisir yang dilesenkan oleh LOFSA dan memenuhi kriteria yang telah ditetapkan juga akan diberikan fleksibiliti untuk beroperasi di dalam negeri mulai 2011. Fleksibiliti ini akan disokong oleh pengukuhan rangka kerja pengawalan dan penyeliaan yang mengawal selia peserta-peserta ini.

Lebih fleksibiliti juga akan diberikan untuk mengambil pekerja ekspatriat dalam bidang-bidang kepakaran yang akan menyumbang kepada pembangunan sektor kewangan.

27 April 2009 (Isnin)

Jeti Pulau Ketam ditutup

Oleh Azian azizkota@utusan.com.my



KESAN retak dapat dilihat pada Jeti Pulau Ketam yang ditutup operasinya mulai semalam.

PELABUHAN KLANG 27 April – Lembaga Pelabuhan Klang (LPK) hari ini mengambil keputusan untuk menghentikan sementara operasi harian di Jeti Pulau Ketam di sini berikutan pelantar terapungnya (ponton) yang menjadi laluan orang ramai untuk naik ke atas bot dilaporkan retak dan dikhuatiri runtuh. Berikutan penutupan yang bermula pukul 7.30 pagi itu, semua operasi harian di jeti terbabit dipindahkan buat sementara di jeti milik Jabatan Laut yang terletak kira-

kira 200 meter dari situ. Keretakan pelantar yang berusia lebih 50 tahun itu dikesan malam semalam dan dipercayai berlaku akibat hentakan kuat oleh bot hampir setiap hari selain usianya yang terlalu lama. Difahamkan lebih 1,000 orang termasuk penduduk Pulau Ketam berulang-alik menggunakan bot ke Pulau Ketam setiap hari. Salah seorang pengguna jeti, Wang Lai Kim, 56, ketika ditemui mendakwa agak sukar menggunakan jeti milik Jabatan Laut kerana ia terlalu tinggi. "Saya perlu melangkah dengan berhati-hati kerana takut jatuh. "Jadi saya harap pihak yang berwajib menyegerakan pembinaan jeti baru untuk keselesaan pengguna," katanya ketika ditemui di sini hari ini.

Seorang lagi pengguna, Goh Lee Thye, 46, berkata, berikutan kejadian itu, dia terpaksa berjalan jauh untuk ke jeti sementara. "Semasa saya tiba di sini pagi tadi pengawal keselamatan beritahu jeti ditutup dan saya perlu berjalan kaki ke jeti sementara dan ia amat meletihkan kerana saya bawa banyak barang," katanya yang mendakwa terlepas satu bot. Sementara itu, tinjauan pemberita di jeti terbabit mendapati kesan keretakan dapat dilihat dengan jelas pada pelantar terbabit manakala sekitar jeti itu direntang dengan tali keselamatan bagi mengelakkan orang ramai memasuki kawasan berkenaan. Seorang pengawal keselamatan turut ditempatkan di situ. Difahamkan kos untuk membina pelantar baru mencecah setengah juta ringgit dan memerlukan hampir tiga bulan untuk disiapkan.

Pengerusi Jawatankuasa Tetap Kerajaan Tempatan, Kajian dan Penyelidikan, Ronnie Liu, yang turut melakukan lawatan ke situ berkata, kerajaan negeri akan berusaha mencari jalan penyelesaian untuk mengatasi masalah itu kerana jeti itu adalah laluan utama bagi penduduk Pulau Ketam ke tanah besar. Mengenai rungutan penduduk yang mendakwa jeti terlalu tinggi untuk memanjat bot, beliau berkata, perbincangan dengan LPK mengenai perkara itu sudah dibuat dan mereka bersetuju menyediakan tangga bagi memudahkan orang ramai naik dan turun.

28 April 2009 (Selasa)

Modenisasi sektor awam

Oleh ZULKIFLI JALIL dan HELMI MOHD. FOAD pengarang@utusan.com.my



Najib Tun Razak bersama timbalannya, Muhyiddin Yassin bersalaman dengan hadirin selepas menyampaikan ucapan pada Majlis Amanat Perdana Perkhidmatan Awam Ke-10 di Pusat Konvensyen Antarabangsa Putrajaya, semalam. – Utusan / Zaki Amiruddin

PUTRAJAYA 28 April – Datuk Seri Najib Tun Razak hari ini mencadangkan jawatan-jawatan utama sektor awam dibuka kepada bakat-bakat daripada sektor swasta dan syarikat berkaitan kerajaan (GLC) selain perkhidmatan tadbir dan diplomatik. Perdana Menteri berkata, pembaharuan struktural perkhidmatan awam itu dicadangkan demi kepentingan rakyat. “Kita tidak boleh lagi terlalu dogmatik, kita perlu mendapatkan bakat yang terpilih, terbaik dan tersaring demi kepentingan rakyat,” katanya pada Majlis Amanat Perdana Perkhidmatan Awam Ke-10 (MAPPA X) di Pusat Konvensyen Antarabangsa Putrajaya di sini.

Beliau berkata, cadangannya mengenai kaedah sistem kemasukan pelbagai peringkat ke dalam perkhidmatan awam itu akan dapat memanfaatkan proses keterampilan bersilang antara bakat-bakat sektor awam dan sektor swasta serta GLC. Najib juga mencadangkan satu dasar pintu terbuka dengan pegawai-pegawai perkhidmatan awam boleh dipinjamkan ke GLC dan sebaliknya untuk saling menimba ilmu.

Perdana Menteri berkata, dengan cara itu pegawai perkhidmatan awam boleh didedahkan kepada keperluan sektor swasta yang merupakan peneraju utama pertumbuhan negara. Bagi mendapatkan bakat yang terbaik, katanya, perkhidmatan awam perlu mencontohi pelan pembangunan kerjaya dan pencarian bakat yang diamalkan seperti Petronas, Permodalan Nasional Berhad dan Bank Negara. “Kita akan menghantar yang terbaik di kalangan penjawat awam untuk menimba ilmu di beberapa institusi tersohor di dunia seperti Kennedy School of Government di Universiti Harvard dan Wharton Business School di Universiti Pennsylvania,” katanya.

Serentak itu, Najib mencabar generasi muda yang hari ini mengkritik sektor awam untuk bersama-sama menambah baik sistem perkhidmatan awam dari dalam. Kata beliau, meskipun kerajaan sedar buat masa ini sektor itu tidak boleh menandingi kelumayan yang ditawarkan oleh sektor swasta tetapi apa yang ia boleh tawarkan adalah rasa kepuasan berkhidmat demi rakyat dan negara. “Dalam menterjemahkan aspirasi ini, saya komited untuk memastikan perkhidmatan awam Malaysia dianggotai anak-anak Malaysia yang terbaik.

“Marilah bersama menyertai sektor awam, mempersebah kudrat dan pemikiran saudara-saudari demi pertiwi. Walau apa pun, kita sedang berusaha untuk menyemak dan menambah baik skim-skim perkhidmatan yang kritikal agar pengorbanan saudara-saudari dihargai,” katanya.

28 April 2009 (Selasa)

Empat anjakan paradigma

PUTRAJAYA 28 April - Datuk Seri Najib Tun Razak menggariskan empat anjakan paradigma modenisasi yang perlu dilaksanakan oleh sektor perkhidmatan awam bagi mencapai kejayaan pada alaf baru. Dalam amanat sulungnya kepada para pegawai dan kakitangan kerajaan,

Perdana Menteri berkata, pembaharuan ke arah anjakan tersebut perlu dilakukan dengan menggabung jalin semua segmen perkhidmatan awam bermula dengan pimpinan atasan. Anjakan tersebut, kata beliau, ialah perubahan daripada ketegaran kepada keanjalan, antara lainnya menjadi pemudah cara kepada proses penciptaan kekayaan yang banyak dimainkan oleh sektor swasta.

"Dari kekayaan yang dicipta oleh pihak swasta, kerajaan mempunyai saham yang dikutip dalam bentuk cukai korporat. "Hasil ini seterusnya digunakan bagi membangunkan negara dan membayar gaji kakitangan awam," kata beliau pada Majlis Amanat Perdana Perkhidmatan Awam Ke-10 (MAPPA X) di Pusat Konvensyen Antarabangsa Putrajaya (PICC) di sini hari ini.

Menurut Perdana Menteri, sektor awam juga perlu beralih daripada budaya *out put* dan perbelanjaan atau kesan nyata semata-mata, kepada mementingkan keberhasilan secara holistik. "Misalnya dalam bidang pelajaran, bukan sahaja jumlah sekolah atau makmal yang mencukupi harus diberikan penekanan tetapi perhatian yang utama harus diberikan kepada soal kejayaan menyeluruh termasuk kebajikan dan moral pelajar," katanya.

Anjakan paradigma ketiga pula, kata beliau, adalah perubahan daripada birokrasi yang menyukarkan kepada birokrasi yang memudah cara serta menyenangkan rakyat. Ini kerana, kata Najib, kerajaan telah meningkatkan taraf perkhidmatan awam termasuk menaikkan gaji asas kakitangan awam daripada 7.5 peratus kepada 35 peratus pada 2007 selain membayar emolumen mencecah RM41 bilion pada tahun lalu. "Persoalannya, di benak rakyat tertanyatanya, adakah perbelanjaan itu berbaloi. Adakah rakyat menikmati nilainya, hasil daripada cukai yang telah dibayar oleh mereka?," katanya.

Seterusnya Perdana Menteri berkata, bagi anjakan paradigma keempat, sektor awam perlu beralih daripada hanya menekankan soal produktiviti kepada gabungan produktiviti, kreativiti dan inovasi. Katanya, gabungan tiga unsur berkenaan mampu melonjakkan kecekapan dan keberkesanannya sektor awam selain menghasilkan penambahbaikan secara anjakan berganda. Oleh itu kata beliau, tanggapan bahawa setiap masalah boleh diselesaikan dengan menubuhkan jabatan atau agensi baru serta menambah kakitangan adalah satu pandangan yang sudah ketinggalan zaman. "Semua jabatan dan agensi kerajaan harus memaksimumkan aplikasi kreativiti dan inovasi. "Matlamat utamanya adalah untuk meningkatkan kepuasan hati pelanggan sektor awam terutamanya rakyat," katanya.

28 April 2009 (Selasa)

Pengusaha pertanian digesa patuhi peraturan 3P

KOTA KINABALU 28 April - Pengeksport, pemborong dan peruncit pertanian di negeri ini disaran mematuhi peraturan 3P iaitu Penggredan, Pembungkusan, dan Pelebelan bagi membolehkan mereka bersaing di peringkat global. Menteri Pertanian dan Industri Makanan negeri, Datuk

Yahya Hussin berkata, langkah itu juga selari dengan peningkatan kesedaran pengguna di seluruh dunia terhadap isu-isu keselamatan makanan dan alam sekitar. "Ekonomi sesebuah negara akan lumpuh jika masalah keselamatan makanan tidak ditangani dengan serius. "Isu melamin memberi pengajaran berguna tentang kesan buruk jika soal keselamatan makanan tidak diberi perhatian," katanya.

Beliau berkata demikian semasa berucap merasmikan Seminar Peraturan 3P Lembaga Pemasaran Pertanian Persekutuan (FAMA) negeri di Wisma Pertanian di sini hari ini.Yahya berkata, dengan pengenalan peraturan 3P itu Malaysia kini mempunyai satu tanda aras dalam menentukan standard sesuatu produk tanaman. Katanya, ketidaaan standard tetap menyebabkan golongan petani menjadi mangsa orang tengah yang bebas menetapkan harga mengikut penilian kualiti yang dilakukan oleh mereka sendiri. "Peraturan ini menjadi penyelesaian kepada kekusutan dalam menentukan standard. FAMA diberi kuasa melaksanakan peraturan 3P ini dan memastikan semua pihak terlibat mematuhi apa yang diwartakan," ujarnya.

Beliau menambah, mengikut cadangan asal, penguat kuasaan peraturan 3P telah bermula 1 April lalu tetapi pelaksanaannya akan dilakukan secara berperingkat-peringkat bagi memberi masa kepada petani menyesuaikan diri dengan kaedah sistem penggredan yang diperkenalkan."Oleh itu saya berharap semua pihak akan mematuhi peraturan 3P kerana selain bersaing di peringkat global, ia juga meningkatkan pendapatan petani dan seterusnya menjayakan hasrat menjadikan pertanian enjin pertumbuhan ekonomi negara," katanya.

Sementara itu, Yahya berkata, Sabah mengeksport sebanyak 6,147 tan metrik sayur-sayuran dan buah-buahan dianggarkan bernilai RM16 juta pada tahun 2007. ""Pasaran utama bagi sayur dan buah-buahan Sabah ini ialah Sarawak dan Semenanjung Malaysia serta negara luar seperti Brunei, manakala nilai import sayur-sayuran dan buah-buahan ialah sebanyak 44,618 tan metrik dengan nilai sekitar RM82 juta," katanya.

29 April 2009 (Rabu)

Hampir RM1juta jelas elaun tertunggak JK

SEREMBAN 29 April - Kerajaan negeri memperuntukkan hampir RM1 juta bagi membayar elaun bulanan tertunggak kepada Pengerusi dan Setiausaha Jawatankuasa Kemajuan dan Keselamatan Kampung (JKK) di negeri ini. Menteri Besar, Datuk Seri Mohamad Hasan berkata, bayaran itu bagi melangsakan elaun yang tertunggak dari awal tahun ini sehingga bulan April bagi penyandang jawatan Pengerusi dan Setiausaha JK yang dilantik baru-baru ini.

"Jumlah tersebut meliputi bayaran elaun bulanan sebanyak RM450 bagi jawatan Pengerusi dan RM100 kepada Setiausaha JK di setiap kawasan bagi tempoh empat bulan yang tertunggak itu," katanya kepada pemberita selepas mempengerusikan mesyuarat Exco di sini hari ini.

Jelasnya, bayaran tersebut akan dibuat secara terus kepada para pemegang jawatan yang baru dilantik dan menerima watikah pelantikan yang berkuatkuasa 1 Mei ini. "Kerajaan negeri telah bersetuju untuk membayar semua elauan yang tertunggak ekoran tamat tempoh perkhidmatan anggota JKKK lama yang berakhir pada 31 Disember tahun lalu," kata beliau.

Baru-baru ini, seramai 557 pengurus dan anggota JKKK dilantik oleh kerajaan negeri selepas mengenalpasti calon-calon yang layak serta berjaya melepassi saringan pemilihan bagi menyandang jawatan JKKK di negeri ini.

Mohamad memberitahu, sebelum ini berlaku kelewatan dalam meluluskan kesemua nama calon JKKK kerana wujud faktor pemilihan calon yang benar-benar layak untuk menerajui jawatan tersebut. Tambah beliau, calon-calon yang dilantik itu akan memegang jawatan tersebut selama tempoh dua tahun yang berkuatkuasa mulai 1 Mei ini hingga 30 April 2011 atau sehingga sebarang pelantikan baru diputuskan kerajaan negeri dalam tempoh berkenaan

29 April 2009 (Rabu)

EAC tawar geran kecil memelihara alam sekitar

KOTA KINABALU 29 April - Jawatankuasa Tindakan Alam Sekitar (EAC) menawarkan geran kecil berjumlah antara RM1,000 hingga RM3,000 bagi melaksanakan projek pemeliharaan dan pemuliharaan alam sekitar di negeri ini. Menurut kenyataan EAC, geran sempena Hari Alam Sekitar Sedunia 2009 itu dibuka kepada pertubuhan bukan kerajaan (NGO) termasuk pihak sekolah, universiti, kolej, kelab dan persatuan di negeri ini.

"Hari Alam Sekitar Sedunia diraikan setiap tahun pada 5 Jun bertujuan memberi kesedaran kepada masyarakat sejagat betapa pentingnya pemeliharaan dan pemuliharaan alam sekitar yang harus diberi tumpuan. "Seperti yang diketahui umum perubahan iklim dan kepanasan global menjadi isu utama kini, jadi geran kecil bagi itu adalah bagi projek pemuliharaan alam sekitar sempena Hari Alam Sekitar bertemakan 'Planet Anda perlukan Anda: Bersatulah Mencegah Kepanasan Iklim'," katanya dalam kenyataan akhbar di sini hari ini.

Menurutnya, kelayakan bagi memperoleh geran tersebut adalah berasaskan kepada keberkesanan dan kelestarian aktiviti memelihara alam sekitar yang dirancang. Jelasnya projek itu hendaklah dilaksanakan mulai 15 Jun ini hingga 30 Julai dan tarikh tutup permohonan adalah pada 20 Mei ini.

29 April 2009 (Rabu)

Projek RM1.14 bilion lulus

KUALA LUMPUR 29 April - Kerajaan telah meluluskan pelaksanaan dua buah projek berkaitan minyak dan gas bernilai RM1.14 bilion pada suku pertama tahun ini. Menurut Timbalan Menteri Perdagangan Antarabangsa dan Industri (MITI), Datuk Mukhriz Mahathir, terdapat minat yang tinggi di kalangan syarikat antarabangsa menjadikan negara ini sebagai lokasi pilihan untuk ibu pejabat serantaunya. Pada sepanjang tahun lalu, sejumlah 16 projek bernilai RM2.7 bilion telah diluluskan. Beliau berkata, keupayaan dan kepakaran tenaga tempatan telah membuka mata syarikat asing untuk terus melabur di negara ini.

Mukhriz berkata demikian selepas merasmikan Forum dan Expo Minyak, Gas dan Petrokimia anjuran Persatuan Pedagang dan Pengusaha Melayu Malaysia (Perdasama) di sini hari ini. Hadir sama Presiden Perdasama, Datuk Moehamad Izat Emir. Forum yang diadakan pada 28 hingga 30 April ini di Pusat Dagangan Dunia Putra (PWTC) di sini menghimpunkan syarikat multinasional di dalam sektor minyak dan gas, badan kerajaan, para pedagang, pembekal dan kontraktor serta penyedia perkhidmatan sektor minyak dan gas.

Acara itu juga dijadikan platform kepada usahawan Melayu membincangkan potensi sektor minyak dan gas di Malaysia. Menurut Mukhriz, Petronas telah melakar nama Malaysia di peta industri minyak dan gas dunia dan kini menjadi satu aliran di kalangan syarikat industri minyak dan gas menggunakan Malaysia sebagai platform bagi operasi di rantau Asia Pasifik. Katanya, Malaysia juga menyediakan prasarana yang mencukupi kepada syarikat asing beroperasi di sini selain menawarkan bantuan teknikal pada peringkat pelaksanaan dan pengurusan bahan, sumber peralatan serta logistik.

Tarikan utama terhadap Malaysia adalah kos perniagaan yang rendah, tenaga kerja yang mahir dan pakar yang banyak, insentif pakej pelaburan yang menarik dan polisi yang liberal tentang penyertaan ekuiti asing. "Sehingga kini sebanyak 20 buah pejabat asing telah membuka dan beroperasi di negara ini," katanya.